

■ De Biebertoler im Reiterhotel un bei dor Märchnweihnacht

Unner Partnerverein ausn Hessnland war wieder mol in Eimstock – extra wagn unnerer Märchnweihnacht! Unnerkomme sei se mit ihrn Bus wie schu öfters in Funke sein Reiterhotel. Im Vürfald wurd e klaans Programm ausgemacht, wie un wuzu mir uns traffn kenne. An Donnerstich nooch do Araas sollt e klaaner Begrießingsobnd sei, an Freitich werd ins Bargwark in dor Schlem eigefahrn, do sölltn natierlich aa vu uns e paar mit dorbei sei. Nu un an Sunnobnd, do war unnerer Märchnweihnacht, do wolltn se allezam hie – in ganzn Tog!

Un su kams, des mir gelei an erschn Obnd dortn im Hotel eigerickt sei, samt unneren Vürstand un e Paarle noch dorzu.

Des war e Obnd, kaa iech eich sogn! Als Gegnleistung vu unneren Besuch in Biebertol 2023, wu mir allis imesist kricht ham - Asserei im leberfluss un de Trinkerei noch dorzu - ham mir de Vorsorhing mit ne Obndbrut iebernumme wölln. Allis wurd vornewag aa schie beredt. Allerdings war is Buf-fett noocherts e weng arg knapp bemassn. Iech hab ogewart bis ziemlich alle durch warn – un hab mieh gar net getraut, in Ardeppl ze namme, do warn när noch viere drinne! De Kließ warn schu lang wag, un Soße när spärlich löfflweis noch do. Aber is gob aa noch gutn Ardäpplkuchn, dar hat den Hessn geschmeckt. Zur Begrießing ham mir Heftle vu ihrer 125-gähring Geschicht un e schiens paar Flaschle Dünsbarg-Bittern kricht.

Unner Yves hat dan ordlich Bandoneon gespielt. Des war is richtche for unnerer Besucher. Ze gutn Schluss saat aaner: „Reich när mol deine Mütz rieber!“ Un wos soll iech eich sogn? Die is ball iebergeloffn for lauter Pnkepinke! Des hat siech wenstns mol geluhnt su kurz vor Weihnachtn. Gelei drauf hat natierlich dor Biebertoler Akkordjonist aufgespielt un sei Schwaster dorzu gesunge un getanzt, dor Cenneth hat sei Teiflsgeich behandelt su des des Ganze ne super Stimming wurn is, Allis hat mitgesunge un gelacht – also des war noocherts e richtscher hessischer Hutznobnd! Un dann war aa schu dor Freitich do, frieh gings lus mit ne Eirichtn dor Bud. Do muss allis ausn Museum raufgeschlaaft warn an Deko, Glie-

weihbehälter usw. Nachmittich beim Simmel mit 3 Auto Gliehweih un Aperolzutatn ohun un in de Bud bzw. beim Möckl zwischnlachern. Esu viel Leit hattn mir in die ganzn Gahr an Freitichobnd noch nie! Do gings schu mol ganz schie zur Sach, de Tassn befülln, mit Pfand vorkaafn un noocherts aa de Tassnkastn zen Spüln nieberbrenge! Un des ging in en fort. Un dann kam aa schu dor Sunnobnd un hat noch emol su viel Leit gebracht. Unner Budnpersonal kunnt gar nimmer racht huch guckn, is Ge-schäft is super geloffn. Ja, un dann warn de Freinde von Dünsbargvrein aa schu do auf unneren Weihnachtsmarkt un ham mächtich for Imsatz gesorcht. Unnerer Biebertoler ham mit ihre Tablett voll Nikolaschka allis am Laafn gehalten.

Su schnell, wie die ausgetrunkn hattn, kunnt mor gar net zur Besinning kumme: do standn se aa schu wieder do! Is is viel gemeinsam dorzählt un gelacht wurn, su des unnerer beedn Voreine siech wetter in bester Freindschaft gut vorstenne! Dor nächste Besuch vu uns in Hessn liecht schu in dor Luft.

